



盛唐彙詩卷第一

四唐彙詩七十一

長樂郡
振鐸西
詩系本

新都

吳勉學

編輯

江湛之校訂

四言古體

江有楓一篇十章

并序

蕭穎士

江有楓思陸鄭二友吳會舊遊且疾讒也臣
宦于尹府以直方不偶見逼讒佞惟古之賢
者有避色避言之義矯然去之二室之間有
械樹焉與江南楓形胥類憩于其下而作是

詩以貽夫二三子焉

江有楓其葉蒙蒙我友自東于以遊從
山有槭其葉漠漠我友徂北于以休息
想彼槭矣亦類其楓矧伊懷人而忘其東
東可遊矣會之丘矣于山于水于廟于寺于亭
于里君子遊焉于以宴喜其樂亶亶

粵東可居彼吳之墟有田有庭有朋有書有尊
有魚君子居焉惟以宴醕其樂徐徐

我朋在矣彼陸之子如松如杞淑問不已

我友于征彼鄭之子如琇如英德音孔明
我思震澤菱芡幕幕寤寐如覲
我思剡谿杉篠萋萋寤寐無迷

有鳥有鳥粵鷗與鷺浮湍戲渚皓然潔素忘其
猜妬彼何人斯曾足傷懼此懼惟何懼寘于羅
彼驕者子讒言孔多我聞先師體命委和公伯
之愬則如予何悵然山河惟以嘯歌其憂也哉

菊榮一篇五章

并序

蕭穎士

菊榮酬贈離且申志也久寓大邑賢宰宋侯

惠而好予賦鳴蟬以貺別有懷相規備厥卒
章于以報焉

采采者菊芬其榮斯紫英黃萼照灼丹墀愷悌
君子佩服攸宜王國是維大君是毗貽爾子孫
百祿萃之

采采者菊于邑之城舊根新莖布葉垂英彼美
淑人應家之禎有絃既鳴我政則平宜爾棟崇
必復其慶

采采者菊于邦之府陰槐翳柳邇楹近宇彼勞

者子喧卑是處慨其莫知蘊結誰語企彼高人
色斯遐舉

采采者菊于賓之館旣低其枝又弱其幹有斐
君子是焉披翫良辰旨酒宴飲無筭愴其此別
終然永歎

歲方晏矣霜露殘促誰其榮斯有英者菊豈微
春華懿此貞色人之侮我混于薪棘詩人有言
好是正直

涼雨一章 并序

蕭穎士

涼雨志楊侯樂賓僚也

習習涼風泠泠浮颺君子樂胥于其賓僚有女
斯天式歌且謠欲言終宥惟以招邀于胥樂兮

有竹一篇七章

并序

蕭穎士

有竹懿李新後閣而宴親友也

有竹斯竿于閣之前君子秉心惟其貞堅兮
有竿斯竹于閣之側君子秉操惟其正直兮
彼蔚者竹蕭其森矣有開者閣宛其深矣迴簷
幽砌如翼如齒

冬之宵霰雪斯漉我有金鑪煴其以歆
夏之日炎景斯鬱我有珍簟淒其以栗

彼紛者務體其豫矣有旨者酒歡其且矣
友僚萃止跼萼載鞞彼美公之姓兮那歟應積
慶兮期子惟去之柄兮

蟬鳴一篇五章

并序

宋華

蟬鳴感秋興送將歸也僻守外邑而蘭陵子
相過詰朝言歸賦詩見志以申贈焉

蟬其鳴矣於彼疎桐庇影容跡何所不容嘒嘒

其長永託於風未見君子我心忡忡既見君子
樂且有融
彼蟬鳴矣於林之表含風飲露以樂吾道有懷
載遷伊誰云保未見君子我心悄悄既見君子
披豁予抱
蟬鳴蟬鳴幽暢乎而蕭蕭爾庭遠近涼颼言赴
高柳叢篁間之思而不見如渴如飢亦既覲止
我思則夷

蟬鳴伊何時運未與匪歎秋徂怨斯路阻願言
莫從鬱悒誰語君子至止慰我延佇何斯違斯
倏爾遐舉
歲之秋深蟬其夕吟披衣軒除蕭蕭風林我友
來斯言告離衿何以叙懷臨水鳴琴何以贈言
委順浮沈

二風詩

有序

元結

天寶丁亥中元子以文辭待制闕下著皇謨
三篇二風詩十篇將與求于司匭以禪天監
會有司奏待制者悉去之於是歸于州里後

三歲以多病習靜於商餘山病間遂題括存
之此亦古之賤士不忘盡臣之分耳其義有
論訂之

治風詩五篇

至仁

古有仁帝能全仁明以封天下故爲至仁之
詩二章四韻十二句
猗皇至聖兮至惠至仁德施蘊蘊蘊蘊如何不
全不缺莫知所貺

猗皇至聖兮至儉至明化流瀛瀛瀛瀛如何不
號不輒莫知其極

至慈

古有慈帝能保靜順以涵萬物故爲至慈之
詩二章四韻十四句

至化之深兮猗猗娒娒如煦如吹如負如持而
不知其慈故莫周莫止靜和而止
至化之極兮瀛瀛溶溶如涵如封如隨如從而
不知其功故莫由莫已順時而理

至勞

古有勞王能執勞儉以大功業故爲至勞之
詩三章六韻二十四句

至哉勤績不盈不延誰能頌之我請頌焉於戲
勞王勤亦何極濟爾九土山川溝洫

至哉儉德不豐不敷誰能頌之我請頌夫於戲
勞王儉亦何深戒爾萬代奢侈荒淫

至哉茂公不升不圯誰能頌之我請頌矣於戲
勞王功亦何大去爾兆庶洪湮災害

至正

古有正王能正慎恭和以安上下故爲至正
之詩一章四韻八句

爲君之道何以爲明功不濫賞罪不濫刑謹言
則聽諂言不聽王至是然可爲明焉

至理

古有理王能守清一以致無刑故爲至理之
詩一章三韻十二句

理何爲兮系修文德加之清一莫不順則意彼

刑法設以化人致使無之而化益純所謂代刑以道去殺嗚呼嗚呼人不斯察

亂風詩五篇

至荒

古有荒王忘戒慎道以逸豫失國故爲至荒之詩一章三韻十二句
國有世謨仁信勤歟王實憍荒終亡此乎焉有力恣諂惑而不忘其國嗚呼亡王忍爲此心敢正亡王永爲世箴

至亂

古有亂王肆極凶虐亂亡乃已故爲至亂之詩二章二韻十二句

嘻乎王家曾有凶王中世失國豈非驕荒復復之難令則可忘
嘻乎亂王王心何思暴淫虐惑無思不爲生人冤怨言何極之

至虐

古有虐王昏毒狂忍無惡不及故爲至虐之

詩二章四韻十八句

夫為君上今慈順明恕可以化人忍行昏恣獨樂其身一徇所欲萬方悲哀於斯而喜當云何

哉

夫為君上今兢慎儉約可以保身忍行荒惑虐

暴於人前世失國如王者多於斯不寤當如之

何

至惑

古有惑王用姦臣以虐外寵妖女以亂內內

外用亂至於崩亾故為至惑之詩二章六韻

二十句

賢聖為上今必儉約戒身鑒察化人所以保福

也如何不思荒恣是為上下隔塞人神怨曩教

惡無厭不畏顛墜

聖賢為上今必用賢正黜姦佞之臣所以長久

也如何反是以為亂矣寵邪信惑近佞好諛廢

嫡立庶忍為禍謨

至傷

古有傷王以崩盪之餘無惡不爲也亂亡之
由固在積累故爲至傷之詩一章二韻十二
句
夫何傷今傷王乎欲何爲乎將蠹枯矣無人救
乎蠹枯及矣不可救乎嗟傷王自爲人君變爲
人奴爲人君者忘戒乎

補樂歌十首

自伏羲氏至于殷室凡十代樂歌有其名無
其辭考之傳記而義或存焉嗚呼樂聲自太

古始百世之後盡亾古音嗚呼樂歌自太古
始百世之後遂亾古辭今國家追復純古列
祠徃帝歲時薦享則必作樂而無雲門咸池
韶夏之聲故揆其名義以補之誠不足全化
金石反正宮羽而或存之猶乙乙冥冥有純
古之聲豈幾乎司樂君子道和焉爾凡十篇
十有九章各引其義以序之命曰補樂歌

網罟

網罟伏羲氏之樂歌也其義蓋稱伏羲能易

人取禽獸之勞凡二章章四句
吾人苦兮水深深網罟設兮水不深
吾人苦兮山幽幽網罟設兮山不幽

豐年

豐年神農氏之樂歌也其義蓋稱神農教人
種植之功凡二章章四句
猗太帝兮其智如神分草實兮濟我生人
猗太帝兮其功如天均四時兮成我豐年

雲門

雲門軒轅氏之樂歌也其義蓋言雲之出潤
益萬物如帝之德無所不施凡二章章四句
玄雲溶溶兮垂雨濛濛類我聖澤兮涵濡不窮
玄雲漠漠兮含映逾光類我聖德兮溥被無方

九淵

九淵少昊氏之樂歌也其義蓋稱少昊之德
淵然深遠凡一章章四句
聖德至深兮齋齋如淵生類皞皞兮孰知其然

五莖

五莖顓頊氏之樂歌也其義益稱顓頊得五德之根莖凡一章章八句

植植萬物兮滔滔根莖五德涵柔兮淪淪而生其生如何兮柚柚天下皆自我君兮化成

六英

六英高辛氏之樂歌也其義益稱帝嚳能總六合之英華凡二章章六句

我有金石兮擊考崇崇與汝歌舞兮上帝之風由六合兮英華淪淪

我有絲竹兮韻和泠泠與汝歌舞兮上帝之聲由六合兮根底羸羸

咸池

咸池陶唐氏之樂歌也其義益稱堯德至大無不備全凡二章章四句

元化油油兮孰知其然至德汨汨兮順之以先元化泥泥兮孰知其然至道泱泱兮由之以全

大韶

大韶有虞氏之樂歌也其義益稱舜能紹先

聖之德凡二章章四句

森森羣象今日見生成欲聞朕初今玄封冥冥
洋洋至化今日見深柔欲聞大濩今大淵油油

大夏

大夏有夏氏之樂歌也其義益稱禹治水其
功能大中國凡三章章四句

茫茫下土兮乃生九州山有長岑兮川有深流
茫茫下土兮乃均四方國有安乂兮野有封疆
茫茫下土兮乃歌萬年上有茂功兮下戴仁天

大濩

大濩有殷氏之樂歌也其義益稱湯救天下
濩然得所凡二章章四句

萬姓苦兮怨且哭不有聖人兮誰濩育
聖人生兮天下和萬姓熙熙兮舞且歌

來日大難

李白

來日一身攜糧負薪道長食盡苦口焦唇今日
醉飽樂過千春仙人相存誘我遠學海凌三山
陸憩五嶽乘龍天飛目瞻兩角授以神藥金丹

滿握螭蛇蒙恩深愧短促思填東海強銜一木
道重天地軒師廣成蟬翼九五以來長生下士
大笑如蒼蠅聲

上崔相百憂章

李白

共工赫怒天維中摧鯤鯨噴蕩揚濤起雷魚龍
陷人成此禍胎火焚崑山玉石相碓仰希霖雨
灑寶炎煨箭發石開戈揮日廻鄒衍慟哭燕霜
颯來微誠不感猶繫夏臺蒼鷹搏攫丹棘崔嵬
豪聖凋枯王風傷哀斯文未喪東嶽豈頽穆逃

楚難鄒脫吳災見機苦遲二公所哈驥不驟進
麟何來哉星離一門草擲二孩萬憤結緝憂從
中催金瑟玉壺盡爲愁媒舉酒太息泣血盈杯
台星再朗天網重恢屈法申恩棄瑕取材冶長
非罪尼父無猜覆盆儻舉應照寒灰

酬諸公見過

王維

嗟予未喪哀此孤生屏居藍田薄地躬耕歲宴
輸稅以奉粢盛晨往東臯草露未晞暮看煙火
負擔來歸我聞有客足掃荆扉簞食伊何鬴瓜

孤棗仰厠羣賢
幡然一老愧無莞
篔簹班荆席藁
泚泚登陂折彼荷
花靜觀素鮪俯映
白沙山鳥羣飛日
隱輕霞登車上馬
倏忽雨散雀噪荒
村雞鳴空館還復
幽獨重欷累歎

盛唐彙詩卷第一

四唐彙詩七十一

盛唐彙詩卷第二

四唐彙詩七十二

新都 吳勉學 編輯

江湛之 校訂

五言古體

樂府

上之回

李白

三十六離宮樓臺與天通
閣道步行月美人愁
煙空恩踈寵不及桃李傷
春風淫樂意何極金輿向
回中萬乘出黃道千旗揚
彩虹前軍細柳

北後騎甘泉東豈問渭川老寧邀襄野童但慕
遙池宴歸來樂未窮

鼓吹入朝曲

李白

金陵控海浦淶水帶吳京饒歌列騎吹颯沓引
公卿槌鐘速嚴妝伐鼓啟重城天子憑玉几劔
履若雲行日出照萬戶簪裾爛明星朝罷沐浴
閑遨遊閨風亭濟濟雙闕下歡娛樂恩榮

前出塞九首

杜甫

戚戚去故里悠悠赴交河公家有程期亡命嬰

禍羅君已富土境開邊一何多棄絕父母恩吞
聲行負戈

又

出門日已遠不受徒旅欺骨肉恩豈斷男兒死
無時走馬脫轡頭手中挑青絲捷下萬仞岡俯
身試搴旗

又

磨刀鳴咽水水赤刃傷手欲輕腸斷聲心緒亂
已父丈夫誓許國憤惋復何有功名圖麒麟戰

骨當速朽

又

送徒既有長遠戍亦有身生歿向前去不勞吏
怒嗔路逢相識人附書與六親哀哉兩決絕不
復問苦辛

又

迢迢萬餘里領我赴三軍軍中異苦樂主將寧
盡聞隔河見胡騎倏忽數百羣我始爲奴僕幾
時樹功勳

又

挽弓當挽強用箭當用長射人先射馬擒賊先
擒王殺人亦有限立國自有疆苟能制侵陵豈
在多殺傷

又

驅馬天雨雪軍行入高山逕危抱寒石指落層
冰間已去漢月遠何時築城還浮雲暮南征可
望不可攀

又

單于寇我壘百里風塵昏雄劍四五動彼軍爲
我奔虜其名王歸繫頸受轅門潛身備行列一
勝何足論

又

從軍十餘年能無分寸功衆人貴苟得欲語羞
雷同中原有鬪爭況在狄與戎丈夫四海志安
可辭固窮

後出塞五首

杜甫

男兒生世間及壯當封侯戰伐有功業焉能守

舊丘召募赴薊門軍動不可留千金買馬鞍百
金裝刀頭閭里送我行親戚擁道周班白居易上
列酒酣進庶羞少年別有贈含笑看吳鉤

又

朝進東門營暮上河陽橋落日照大旗馬鳴風
蕭蕭平沙列萬幕部伍各見招中天懸明月令
嚴夜寂寥悲笳數聲動壯士慘不驕借問大將
誰恐是霍嫖姚

又

古人重守邊今人重高勳豈知英雄主出師
長雲六合已一家四夷且孤軍遂使貔虎士奮
身勇所聞拔劍擊大荒日收胡馬羣誓開玄冥
北持以奉吾君

又

獻凱日繼踵兩蕃靜無虞漁陽豪俠地擊鼓吹
笙竿雲帆轉遼海秔稻來東吳越羅與楚練照
耀輿臺軀主將位益崇氣驕凌上都邊人不敢
議議者死路衢

又

我本良家子出師亦多門將驕益愁思身貴不
足論躍馬二十年恐辜明主恩坐見幽州騎長
驅河洛昏中夜間道歸故里但空村惡名幸脫
免窮老無兒孫

折楊柳

李白

垂楊拂淥水搖豔東風年花明玉關雪葉煖金
牕煙美人結長想對此心悽然攀條折春色遠
寄龍庭前

又

余延壽

天道連國門東西種楊柳歲蕤君不見裊娜垂
來久緣枝棲暝禽雄去雌獨吟餘花怨春盡微
月起秋陰坐望牕中蝶起攀枝上葉好風吹長
條婀娜何如妾妾見柳園新高樓四五春莫吹
胡塞曲愁沒隴頭人

關山月

李白

明月出天山蒼茫雲海間長風幾萬里吹度玉
門關漢下白登道胡窺青海灣由來征戰地不

見有人還戍客望邊色思歸多苦顏高樓當此
夜歎息未應閑

又

徐九臯

玉塞抵長城金徽映高闕遙心萬餘里直望三
邊月霜靜影逾懸露稀光漸沒思君不可見空
歎將焉歎

幽州胡馬客歌

李白

幽州胡馬客綠眼虎皮冠笑拂兩隻箭萬人不
可干彎弓若轉月白鴈落雲端雙雙掉鞭行遊

獵向樓蘭出門不顧後報國歿何難天驕五單
于狼戾好兇殘牛馬散北海割鮮若虎餐雖居
燕支山不道朔雪寒婦女馬上笑顏如頰玉盤
翻飛射鳥獸花月醉雕鞍旄頭四光芒芒爭戰如
蜂攢白刃灑赤血流沙爲之丹名將古誰是疲
兵良可歎何時天狼滅父子得閑安

江南曲

劉春虛

美人何蕩漾湖上風日長玉手欲有贈徘徊雙
明璫歌聲隨綠水怨色起青陽日暮還家望雲

波橫洞房

挽歌詞

趙微明

寒食蒿上明淒淒郭東路素車誰家子丹旄引
將去原下荆棘叢叢邊有新墓人生痛長別此
是長別處曠野何蕭條風悲白楊樹

古挽歌

孟雲卿

草草閭巷喧塗車儼成位冥冥何所須盡我生
人意北邙路非遠此別終天地臨穴頻撫棺至
哀反無淚爾形未衰老爾息纔童稚骨肉安可

離皇天若容易房帷卽靈帳庭宇爲哀次薤露
歌若斯人生盡如寄

陌上桑

李白

美女渭橋東春還事蠶作五馬如飛龍青絲結
金絡不知誰家子調笑來相謔妾本秦羅敷玉
顏豔名都綠條映素手採桑向城隅使君且不
顧況復論秋胡寒蠶愛碧草鳴鳳棲青梧託心
自有處但恠傍人愚徒令白日暮高駕空踟躕

對酒行二首

李白

松子棲金華安期入蓬海此人古之仙羽化竟
何在浮生速流電倏忽變化彩天地無彫換容
顏有遷改對酒不肯飲含情欲誰待

又

勸君莫拒杯春風笑人來桃李如舊識傾花向
我開流鶯啼碧樹明月窺金罍昨來朱顏子今
日白髮催棘生石虎殿鹿走姑蘇臺自古帝王
宅城闕閉黃埃君若不飲酒昔人安在哉

長歌行

李白

卷二
桃李得日開榮華照當年東風動百物草木盡
欲言枯枝無醜葉涸水吐清泉大力運天地義
和無停鞭功名不早著竹帛將何宣桃李務青
春誰能貫白日富貴與神仙蹉跎成兩失金石
猶銷鑠風霜無久質畏落日月後強歡歌與酒
秋霜不惜人倏忽侵蒲柳

又

王昌齡

曠野饒悲風颼颼黃蒿草繫馬倚白楊誰知我
懷抱所是同袍者相逢盡衰老北登漢家陵南

望長安道下有枯樹根上有鼯鼠窠高皇子孫
盡千載無人過寶玉頻發掘精靈其柰何人生
須達命有酒且長歌

短歌行

李白

白日何短短百年苦易滿蒼穹浩茫茫萬劫太
極長麻姑垂兩鬢一半已成霜天公見玉女大
笑億千場吾欲攬六龍迴車挂扶桑北斗酌美
酒勸龍各一觴富貴非所願爲人駐顏光

銅雀妓

高適

日暮銅雀迴秋深玉座清蕭森松柏望委鬱綺
羅情君恩不再得妾舞爲誰輕

猛虎詞

儲光羲

寒亦不憂雪饑亦不食人人肉豈不甘所惡傷
明神太室爲我宅孟門爲我鄰百獸爲我膳五
龍爲我賓蒙馬一何威浮江一以仁彩章耀朝
日爪牙雄武臣高雲逐氣浮厚地隨聲震君能
賈餘勇日夕長相親

燕歌行

陶翰

請君留楚調聽我吟燕歌家在遼水頭邊風意
氣多出身爲漢將正值戎未和雪中凌天山水
上度交河大小百餘戰封侯竟蹉跎歸來灞陵
下故舊無相過雄劔委塵匣空門唯雀羅玉簪
還趙妹瑤琴付齊娥昔日不爲樂時哉今柰何

從軍行

一作王昌齡

杜頌

秋草馬蹄輕角弓持弦急去爲龍城候正值胡
兵襲軍氣橫大荒戰酣日將入長風金鼓動白
露鐵衣濕四起愁邊聲南轅時佇立斷蓬孤自

轉寒鷹飛相及萬里雲沙漲平川冰霰澀夜聞
漢使歸獨向刀環泣

又

崔國輔

塞北胡霜下營州索兵救夜裏偷道行將軍馬
亦瘦刀光照塞月陣色明如晝傳聞賊滿山已
共前鋒鬪

又

王昌齡

向夕臨大荒朔風軫歸慮平沙萬里餘飛鳥宿
何處虜騎獵長原翩翩傍河去邊聲搖白草海

氣生黃霧百戰苦風塵十年履霜露雖投定遠
筆未坐將軍樹早知行路難悔不理章句

又

吹角動行人喧喧行人起笳悲馬嘶亂爭渡金
河水日暮沙漠陞戰聲煙塵裏盡繫名王頸歸
來獻天子

豫章行

李白

胡風吹代馬北擁魯陽關吳兵照海雪西討何
時還半渡上遼津黃雲慘無顏老母與子別呼

天野草間百鳥繞旌旗悲鳴相追攀白楊秋月
苦早落豫章山本爲休明人斬虜素不閑豈惜
戰鬪死爲君掃兇頑精感石沒羽豈云憚險艱
樓船若鯨飛波蕩落星灣此曲不可奏三軍鬢
成斑

相逢行

李白

朝騎五花馬謁帝出銀臺秀色誰家子雲車珠
箔開金鞭遙指點玉勒近遲回夾轂相借問疑
從天上來邀入青綺門當歌共銜杯銜杯映歌

扇似月雲中見相見不得親不如不相見相見
情已深未語可知心胡爲守空閨孤眠愁錦衾
錦衾與羅幃纏綿會有時春風正澹蕩暮雨來
何遲願因三青鳥更報長相思光景不待人須
臆髮成絲當年失行樂老去徒傷悲持此道密
意毋令曠佳期

北上行

李白

北上何所苦北上緣太行磴道盤且峻巉巖凌
穹蒼馬足蹶側石車輪摧高岡沙塵接幽州烽

火連朔方殺氣毒劒戟嚴風裂衣裳奔鯨夾黃
河鑿齒屯洛陽前行無歸日返顧思舊鄉慘慄
水雪裏悲號絕中腸尺布不掩體皮膚劇枯桑
汲水澗谷阻採薪墮坂長猛虎又掉尾磨牙皓
秋霜草木不可餐饑飲零露漿歎此北上苦停
驂爲之傷何日王道平開顏覩天光

野田黃雀行

儲光義

嘖嘖野田雀不知軀體微閑穿深叢裏爭食復
爭飛窮老一顏舍棗多桑樹稀無棗猶可食無
桑何以衣蕭條空倉暮相引時來歸斜路豈不
捷渚田豈不肥水長路且壞惻惻與心違

隴西行

王維

十里一走馬五里一揚鞭都護軍書至匈奴圍
酒泉關山正飛雪烽戍斷無煙

放歌行

王昌齡

南渡洛陽津西望十二樓明堂坐天子月朔朝
諸侯清樂動千門皇風被九州慶雲從東來泱
泱抱日流昇平貴論道文墨將何求有詔徵草

澤微誠將獻謀冠冕如星羅拜揖曹與周望塵
非吾事入賦且遲留幸蒙國士識因脫負薪裘
今者放歌行以慰梁甫愁但營數斗祿奉養每
豐羞若得金膏遂飛雲亦可儔

又

孟雲卿

吾觀天地圖世界亦可小落落大海中飄浮數
洲島賢愚與蟻蟲一種同草草地脉日夜流天
衣有時掃東山謁居士了我生死道目見難噬
臍心通可親腦軒皇竟磨滅周孔亦衰老永謝

當時人吾將寶非寶

門有車馬客行

李白

門有車馬客金鞍耀朱輪謂從雲霄落乃是故
鄉親呼兒掃中堂坐客謂悲辛對酒兩不飲停
觴淚盈巾歎我萬里遊飄颻三十春空談霸王
略紫綬不挂身雄劍藏玉匣陰符生素塵廓落
無所合流離湘水濱借問宗黨間多爲泉下人
生苦百戰役死託萬鬼鄰北風揚胡沙霾翳周
與秦大運且如此蒼穹寧匪仁惻愴竟何道存

亡任天鈞

東武吟

一題作出東門後書
懷留別翰林諸公

李白

好古笑流俗素聞賢達風方希佐明主長揖辭
成功白日在高天迴光燭微躬恭承鳳凰詔歛
起雲羅中清切紫霄迴優游丹禁通君王賜顏
色聲價凌煙虹乘輿擁翠蓋扈從金城東寶馬
麗絕景錦衣入新豐倚巖望松雪對酒鳴絲桐
因學楊子雲獻賦甘泉宮天書美片善清芬播
無窮歸來入咸陽談笑皆王公一朝去金馬飄

落成飛蓬賓客日踈散玉樽亦已空才力猶可
恃不慙世上雄閑作東武吟曲盡情未終書此
謝知己吾尋黃綺翁

怨歌行

李白

十五入漢宮花顏笑春紅君王選玉色侍寢金
屏中薦枕嬌夕月卷衣戀香風寧知趙飛燕奪
寵恨無窮沈憂能傷人綠鬢成霜蓬一朝不得
意世事徒爲空鸚鵡換美酒舞衣罷雕龍寒苦
不忍言爲君奏絲桐腸斷絃亦絕悲心夜忡忡

子夜四時歌四首

集題作子夜吳歌李白

秦地羅敷女采桑綠水邊素手青條上紅妝白日鮮蠶饑妾欲去五馬莫留連

又

鏡湖三百里菡萏發荷花五月西施采人看隘若耶回舟不待月歸去越王家

又

長安一片月萬戶擣衣聲秋風吹不盡總是玉關情何日平胡虜良人罷遠征

又

明朝驛使發一夜絮征袍素手抽針冷那堪把剪刀裁縫寄遠道幾日到臨洮

丁督護歌

李白

雲陽上征去兩岸饒商賈吳牛喘月時拖船一何苦水濁不可飲壺漿半成土一唱都護歌心摧淚如雨萬人鑿盤石無由達江滸君看石芒碭掩淚悲千古

春江花月夜二首

張子容

林花發岸口氣色動江新此夜江中月流光花
上春分明石潭裏宜照浣紗人

又

交甫憐瑤珮仙妃難重期沈沈綠江晚惆悵碧
雲姿初逢花上月言是弄珠時

大堤曲

李白

漢水橫襄陽花開大堤煖佳期大堤下淚向南
雲滿春風復無情吹我夢魂散不見眼中人天
長音信斷

采菱詞

儲光羲

濁水菱葉肥清水菱葉鮮我不遊濁水志士多
苦言潮沒具區藪潦深雲夢田朝隨北風去暮
逐南風旋浦口多魚家相與邀我船飯稻以終
日羹葍將永年方冬水物窮又欲休山樊盡室
相隨從所貴無憂患

陽春歌

吳象之

簾低曉露濕簾捲鶯聲急欲起把筇篻如凝管
絃澀孤眠愁不轉點淚聲相及淨掃堦上花風

來更吹入

湖邊采蓮婦

李白

小姑織白紵未解將人語
大嫂采芙蓉谿湖千萬重
長兄行不在莫使外人逢
願學秋胡婦貞心比古松

鳳凰曲

李白

羸女吹玉簫吟弄天上春
青鸞不獨去更有携手人
影滅彩雲斷遺聲落西秦

東海有勇

李白

梁山感杞妻慟哭爲之傾
金石忽斲開都由激深情
東海有勇婦何慙蘇子卿
學劍越處子超騰若流星
捐軀報夫讎萬死不顧生
白刃耀素雪蒼天感精誠
十步兩跳躍三呼一交兵
斬首掉國門蹴踏五藏行
豁此伉儷憤粲然大義明
北海李使君飛章奏天庭
捨罪警風俗流芳播滄瀛
志在列女籍竹帛以光榮
淳于免詔獄漢主爲緹紫
津妾一棹歌脫父於嚴刑
十子若不肖不如一女英
豫讓斬空衣有心竟無成
要離

殺慶忌壯夫所素輕妻子亦何辜焚之買虛聲
豈如東海婦事立獨揚名

湘夫人

李頎

九嶷日已暮三湘雲復愁
宵靄羅袂色潺湲江
水流佳期來北渚
捐佩在芳洲

盛唐彙詩卷第二

四唐彙詩七十二

盛唐彙詩卷第三

四唐彙詩七十三

新都

吳勉學 編輯

江湛之 校訂

五言古體

樂府

少年行五首

王昌齡

西陵俠少年送客短長亭
青槐夾兩道白馬如
流星聞道羽書急
單于寇井陘氣高輕
赴難誰顧燕山銘

又

走馬遠相尋西樓下夕陰結交期一劍留意贈
千金高閣歌聲遠重門柳色深夜闌須盡飲莫
負百年心

又

李嶷

十八羽林郎戎衣侍漢王臂鷹金殿側挾彈玉
輿傍馳道春風起陪遊出建章

又

侍獵長楊下承恩更射飛塵生馬影滅箭落鴈

行稀薄暮隨天仗聯翩入瑣闈

又

玉劍膝邊橫金杯馬上傾朝遊茂陵道夜宿鳳
凰城豪吏多猜忌無勞問姓名

又

李白

擊筑飲美酒劍歌易水湄經過燕太子結託并
州兒少年負壯氣奮烈自有時因聲魯勾踐爭
搏勿相欺

結客少年場行

李白

紫燕黃金瞳稜稜搖綠髮平明相馳逐結客洛
門東少年學劒術凌轢白猿公珠袍曳錦帶七
首插吳鴻由來萬夫勇挾此生雄風託交從劇
孟買醉入新豐笑盡一杯酒殺人都市巾羞道
易水寒從今日貫虹燕丹事不立虛沒秦帝宮
武陽灰灰人安可與成功

少年子

李白

青雲少年子挾彈章臺左鞍馬四邊開突如流
星過金丸落飛鳥夜入瓊樓臥夷齊是何人獨

守西山餓

古朗月行

李白

小時不識月呼作白玉盤又疑瑤臺鏡飛上青
雲端仙人垂兩足桂樹何團團白兔搗藥成問
言誰與餐蟾蜍蝕圓影大明夜已殘羿昔落九
烏天人清且安陰精此淪惑去去不足觀憂來
其如何惻愴摧心肝

朗月行

朗月照簾幌月夜有餘姿洞房怨孤枕挾瑟愛

前墀萱草已數葉梨花復遍枝去歲草始榮與
君新相知今年花未落誰分生別離代情難重
論人事好乖移合比月華滿分同月易虧虧月
當再圓人別星隕天吾欲竟此曲意深不可傳
歎息孤鸞鳥傷心明鏡前

長干行

張潮

憶妾深閨裏煙塵不曾識嫁與長干人沙頭候
風色五月南風興思君下巴陵八月西風起想
君發揚子去來悲如何見少離別多湘潭幾日

到妾夢越風波昨夜狂風度吹折江頭樹森森
暗無邊行人在何處北客真王公朱衣滿江中
薄暮來投宿數朝不肯東好乘浮雲驄佳期蘭
渚東鴛鴦綠蒲上翡翠錦屏中自憐十五餘顏
色桃花紅那作商人婦愁水復愁風

又

李白

妾髮初覆額折花門前劇郎騎竹馬來遶牀弄
青梅同居長千里兩小無嫌猜十四爲君婦羞
顏未嘗開低頭向暗壁千喚不一迴十五始展

眉顏同塵與灰常存抱柱信豈上望夫臺十六
君遠行瞿塘灩澦堆五月不可觸猿聲天上哀
門前遲行跡一一生綠苔苔深不能掃落葉秋
風早八月蝴蝶黃雙飛西園草感此傷妾心坐
愁紅顏老早晚下三巴預將書報家相迎不道
遠直至長風沙

古離別

王縉

下階欲離別相對映蘭叢含辭未及吐淚落蘭
叢中高堂靜秋日羅衣飄暮風誰能待明月迴

首見牀空

又

孟雲卿

朝日上高臺離人怨秋草但見萬里天不見萬
里道君行本超遠苦樂良難保宿昔夢同衾憂
心常傾倒含酸欲誰訴展轉傷懷抱結髮年已
遲征行去何早寒暄有時謝憔悴難再好人皆
筭年壽歿者何曾老少壯無見期水深風浩浩

又

張彪

別離無遠近事歡情亦悲不聞車輪聲後會將

何時去日忘寄書來日垂前期縱知明當返一
息千萬思

今別離

孟雲卿

結髮生別離相思復相保如何日已久五變中
庭草渺渺大海途悠悠吳江島但恐不出門出
門無遠道遠道行既難家貧衣復單嚴風吹積
雪晨起鼻何酸人生各有志豈不懷所安分明
天上日生歿願同歡

樹中草

李白

鳥銜野田草誤入枯桑裏客土植危根逢春猶
不歿草木雖無情因依尚可生如何同枝葉各
自有枯榮

沐浴子

李白

沐芳莫彈冠浴蘭莫振衣處世忌太潔志人貴
藏輝滄浪有釣叟吾與爾同歸

千里思

李白

李陵沒胡沙蘇武還漢家迢迢五原關朔雪亂
邊花一去隔絕國思歸但長嗟鴻鴈向西北因

書報天涯

枯魚過河泣

李白

白龍改常服偶被豫且制誰使爾爲魚徒勞訴
天帝作書報鯨鯢勿恃風濤勢濤落歸泥沙翻
遭螻蟻噬萬乘慎出入柏人以爲識

俠客行

李白

趙客縵胡纓吳鉤雪霜明銀鞍照白馬颯沓如
流星十步殺一人千里不留行事了拂衣去深
藏身與名閑過信陵飲脫劍膝前橫將炙啖朱

亥持觴勸侯嬴三杯吐然諾五嶽倒爲輕眼花
耳熱後意氣素霓生救趙揮金槌邯鄲先震驚
千秋二壯士烜赫大梁城縱死俠骨香不慙世
上英雄能書閣下白首太玄經

獨不見

李白

白馬誰家子黃龍邊塞見天山三丈雪豈是遠
行時春蕙忽秋草莎鷄鳴曲池風摧寒櫓響月
入霜閨悲憶與君別年種桃齊蛾眉桃今百餘
尺花落成枯枝終然獨不見流淚空自知

妾薄命

李白

漢帝重阿嬌貯之黃金屋咳唾落九天隨風生
珠玉寵極愛還歇妬深情却疎長門一步地不
肯暫迴車雨落不上天水覆難再收君情與妾
意各自東西流昔日芙蓉花今成斷腸草以色
事他人能得幾時好

君子有所思行

李白

紫閣連終南青冥天倪色憑崖望咸陽宮闕羅
北極萬井驚畫出九衢如弦直渭水清銀河橫

天流不息朝野盛文物衣冠何翕輻廐馬散連
山軍容威絕域伊臯運元化衛霍輸筋力歌鐘
樂未休榮去老還逼圓光過滿缺太陽移中昊
不散東海金何爭西輝匿無作牛山悲惻愴淚
沾臆

白馬篇

李白

龍馬花雪毛金鞍五陵豪秋霜切玉劔落日明珠
袍鬪雞事萬乘軒蓋一何高弓摧南山虎手接
太行猱酒後競風采三杯弄寶刀殺人如剪草

劇孟同遊傲發憤去函谷從軍向臨洮叱咤經
百戰匈奴盡奔逃歸來使酒氣未肯拜蕭曹羞
入原憲室荒徑隱蓬蒿

發白馬

李白

將軍發白馬旌節渡黃河蕭鼓聒川嶽滄溟湧
濤波武安有振瓦易水無寒歌鐵騎若雪山飲
流涸滹沱揚兵獵月窟轉戰略朝那倚劍登燕
然邊鋒列嵯峨蕭條萬里外耕作五原多一掃
清大漠包虎戢金戈

空城雀

李白

嗷嗷空城雀身計何戚促本與鷦鷯羣不隨鳳
凰族提攜四黃口飲乳未嘗足食君糠粃餘常
恐烏鳶逐耻涉太行險羞營覆車粟天命有定
端守分絕所欲

秦女休行

李白

西門秦氏女秀色如瓊花手揮白楊刀清晝殺
讎家羅袖灑赤血英聲凌紫霞直上西山去關
吏相邀遮壻爲燕國王身被詔獄加犯刑若履

虎不畏落爪牙素頸未及斷摧眉伏泥沙金雞
忽放赦大辟得寬賒何慙聶政姊萬古共驚嗟

變行路難

王昌齡

向晚橫吹悲風動馬嘶合前驅引旗節千里陣
雲匝單于下陰山沙礫共颯颯封侯取一戰豈
復念閨閣

行路難

孟雲卿

君不見高山萬仞連蒼昊天長地久成埃塵君
不見長松百尺多勁節狂風暴雨終摧折古今

何世無聖賢吾愛伯陽真乃天金堂玉闕朝羣
仙拍手東海成桑田海中之水慎勿枯烏鳶啄
蚌傷明珠行路難艱險莫踟躕

行行且遊獵篇

孟雲卿

少年多武力勇氣冠幽州何以縱心賞馬蹄春
草頭遲遲平原上狐兔奔林丘猛火忽前逝俊
鷹連下鞬俯身逐南北輕捷固難儔所發無不
中失之如我讎豈唯務馳騁倚爾暴田疇殘殺
非不痛古來良有由

悲行哉

王昌齡

勿聽白頭吟人間易憂怨若非滄浪子安得從
所願北上太行山臨風閱吹萬長雲數千里倏
忽還膚寸觀其微滅時精意莫能論百年不容
息是處生意蔓始悟海上人辭君永飛遯

又

孟雲卿

孤兒去慈親遠客喪主人莫吟苦辛曲此曲誰
忍聞可聞不可說去去無期別行人念前程不
待參辰沒朝亦常苦饑飄飄萬餘里貧賤多是
非少年莫遠遊遠遊多不歸

薊門行五首

高適

薊門逢古老獨立思氛氲一身既零丁頭髮白
紛紛勲庸今已矣不識霍將軍

又

漢家能用武開拓窮異域戍卒厭糟糠降胡飽
衣食關亭試一望吾欲淚沾臆

又

邊城十一月雨雪亂霏霏元戎號令嚴人馬亦

輕肥羌胡無近日征戰幾時歸

又

幽州多騎射結髮重橫行一朝事將軍出入有
聲名紛紛獵秋草相向角弓鳴

又

黯黯長城外日沒更煙塵胡騎雖憑陵漢兵不
顧身古樹滿空塞黃雲愁殺人

出自薊北門行

李白

虜陣橫北荒胡星耀精芒羽書速驚電烽火晝

連光虎竹救邊急戎車森已行明主不安席安
劍心飛揚推轂出猛將連旗登戰場兵威衝絕
漠殺氣凌穹蒼列陣赤山下開營紫塞傍孟冬
風沙緊旌旗颯凋傷畫角悲海月征衣卷天霜
揮刃斬樓蘭彎弓射賢王單于一平蕩種落自
奔亡收功報天子歌舞歸咸陽

苦熱

樂府詩集
作苦熱行

赤日滿天地火雲成山嶽草木盡焦卷川澤皆
竭涸輕紈覺衣重密樹苦陰薄莞簟不可近絺

綵再三濯思出宇宙外曠然在寥廓長風萬里
來江海蕩煩濁却顧身為患始知心未覺忽入
甘露門宛然清涼樂

奉和李大夫同呂評事太行苦熱行兼

寄院中諸公

郭茂倩收
入樂府

獨孤及

駟馬上太行脩途亘遼碣王程無留駕日晏未
遑歇請問此何時恢矣朱明月長虵稽天討上
將方北伐明主命使臣皇華得時傑已忘羊腸
撿豈憚濕風熱搖策汗滂滄登岍思紆結炎雲

如煙火谿谷將恐竭晝景絕可畏涼飈何由發
山長飛鳥墮目極行車絕趙魏方俶擾安危俟
明哲歸路豈不懷飲冰有苦節會同傳檄至疑
議立談決況有阮元瑜翩翩秉書札起予歌赤
坂永好踰白雪誰念剖竹人無因執羈繼

邯鄲才人嫁為廝養卒婦 李白

妾本崇臺女揚蛾入丹闕自倚顏如花寧知有
周歌一辭玉階下去若朝雲沒每憶邯鄲城深
宮夢秋月君王不可見惆悵至明發

秦女卷衣

李白

天子居未央妾本卷衣裳顧無紫宮寵敢拂黃
金牀水至亦不去熊來尚可當微身奉日月飄
若螢火光願君采葑菲無以下體妨

步虛詞

吳筠

扶桑誕初景羽蓋凌晨霞倏歛造西域嬉遊金
母家碧津湛洪源灼爍敷荷花煌煌青琳宮璨
璨列玉華真氣溢絳府自然思無邪俯矜區中
士天濁良可嗟

又

瓊臺劫萬仞孤映大羅表常有二素雲凝光自
飛遶羽童泛明霞升降何縹緲鸞鳳嘯雅音栖
翔絳林杪玉虛無晝夜靈景何皎皎一覩太上
京方知衆天小

又

二氣播萬有化機無停輪而我操其端乃能出
陶鈞寥寥大漠上所遇皆清真澄瑩含元和氣
同自相親絳樹結丹實紫霞流碧津以茲保童

嬰永用超形神

又

吳筠

稟化凝正氣鍊形為真仙忘心符元宗返本叶
自然帝乙集絳宮流光出丹玄元英與桃君朗
咏長生篇六符煥明霞百闕羅紫煙飈車涉寥
廓靡靡乘景遷不覺雲路遠斯須周萬天

又

灼灼青華林靈風振瓊柯三光無冬春一氣清
且和迴首邇結靈傾眸親曜羅豁落制六天流

鈴百威魔縣縣慶不極誰謂椿齡多

又

爰從太微上四觀虛皇尊騰我八景輿威遲入
天門既登玉晨庭肅肅仰紫軒敢問龍漢末如
何闢乾坤怡然輟雲璈告我希夷言幸聞至精
理方見造化源

又

郭茂倩樂府作韋渠牟詩

吳筠

紫府與玄洲誰來物外遊無煩騎白鹿不用駕
青牛金化顏應駐雲飛鬢不秋仍聞碧海上更

用玉爲樓

又

玉樹雜金花
天河織女家
月邊丹鳳鳥
風送紫鸞車
霧縠籠綃帶
雲屏列錦霞
瑤臺千萬里
不覺往來賒

又

愍俗從遷謝
尋仙去淪沒
三光有真人
與我生道骨
凌晨吸丹景
入夜飲黃月
百關彌惆悵
方寸益清越
栖神合虛無
洞覽周恍惚
不覺隨玉

皇焚香詣金闕

又

怡神在靈府
皎皎含清澄
仙經不吾欺
輕舉信有徵
疇昔希道念
而今果天真
豈非陰功著
乃致白日昇
焉用過洞府
吾其越朱陵

又

予因詣金闕
飛蓋超西極
遂入素中天
停輪大濠側
若華拂流影
不使白日匿
傾曦復停午
六合無暝色
道化隨感遷
此理誰能測

又

高昇紫極上宴此玄都岑玉蓋散奇香瓊柯流
雅音靈風生太漠習習吹人襟體混希微廣神
疑空洞深蕭然宇宙外自得乾坤心

盛唐彙詩卷第三

四唐彙詩七十四

盛唐彙詩卷第四

四唐彙詩七十四

新都

吳勉學 編輯
陸麀祥 校訂

五言古體

樂府

扶南曲歌詞五首

王維

翠羽流蘇帳春眠曙不開羞從面色起嬌逐語
聲來早向昭陽殿君王中使催

又

堂上青絃動堂前綺席陳齊歌盧女曲雙舞洛陽人傾國徒相看寧知心所親

又

香氣傳空滿妝華影箔通歌聞天仗外舞出御樓中日暮歸何處花間長樂宮

又

宮女還金屋將眠復畏明入春輕衣好半夜薄妝成拂曙朝前殿玉墀多珮聲

又

朝日照綺牕佳人坐臨鏡散黛恨猶輕插釵嫌未正同心勿遽遊幸待春妝竟

黃葛篇

李白

黃葛生洛谿黃花自綿羃青煙蔓長條繚繞幾百尺閨人費素手采緝作絺綌縫爲絕國衣遠寄日南客蒼梧大火落暑服莫輕擲此物雖過時是妾手中跡

塞上曲

王昌齡

秋風夜渡河吹却鴈門桑遙見胡地獵鞬馬宿

嚴霜五道分兵去孤軍百戰場功多翻下獄士
卒但心傷

又

常建

翩翩雲中使來問太原卒百戰苦不歸刀頭怨
明月塞雲隨陣落寒日傍城沒城下有寡妻哀
哀哭枯骨

又三首

李白

天兵下北荒胡馬欲南飲橫戈從百戰直爲銜
恩甚握雪海上餐拂沙隴頭寢何當破月氏然

後方高枕

又

白馬黃金塞雲沙遶夢思那堪愁苦節遠憶邊
城兒螢飛秋牕滿月度霜歸遲摧殘梧桐葉蕭
颯沙棠枝無時獨不見流淚空自知

又

烽火動沙漠連照甘泉雲漢皇按劍起還召李
將軍兵氣天上合鼓聲隴底聞橫行負勇氣一
戰淨妖氛

又

李白

大漢無中策匈奴犯渭橋五原秋草綠胡馬一
何驕命將征西極橫行陰山側燕支落漢家婦
女無花色轉戰渡黃河休兵樂事多蕭條清萬
里瀚海寂無波

塞下曲四首

王昌齡

蟬鳴空桑林八月蕭關道出塞入塞寒處處黃
蘆草從來幽并客皆共塵沙老莫學游俠兒矜
誇紫騮好

又

飲馬渡秋水水寒風似刀平沙日未沒黯黯見
臨洮昔日長城戰咸言意氣高黃塵是今古白
骨亂蓬蒿

又

奉詔甘泉宮總徵天下兵朝廷備禮出郡國豫
郊迎紛紛幾萬人去者無全生臣願節宮廄分
以賜邊城

又

邊頭何慘慘已矣霍將軍部曲皆相弔燕南代
北聞功勳多被黜兵馬亦尋分更遣黃龍戍唯
當哭塞雲

又

高適

結束浮雲駿翩翩出從戎且憑天子怒復倚將
軍雄萬鼓雷殷地千旗火生風日輪駐霜戈月
魄懸琯弓青海陣雲匝黑山兵氣衝戰酣太白
高戰罷旄頭空萬里不惜死一朝得成功畫圖
麒麟閣入朝明光宮大笑向文士一經何足窮

古人昧此道往往成老翁

又

李頎

黃雲鴈門郡日暮風沙裏千騎黑貂裘皆稱羽
林子金笳吹朔雪鐵馬嘶雲水帳下飲蒲萄平
生寸心是

又

薛竒童

驕虜初南下煙塵暗國中獨召李將軍夜開甘
泉宮一身許明主萬里總元戎霜甲卧不煖夜
半聞邊風胡天早飛雪荒徼多轉蓬寒雲覆水

重秋氣連海空金鞍誰家子上馬鳴角弓自是
幽并客非論愛立功

古塞下曲

李頎

行人朝走馬直指薊城傍薊城通漠北萬里別
吾鄉海上千烽火沙中百戰場軍書發上郡春
色度河陽裊裊漢宮柳青青胡地桑琵琶山色
曲橫笛斷君腸

又

陶翰

進軍飛狐北窮寇勢將變日落沙塵昏背河更

一戰駢馬黃金勒瑠弓白羽箭射殺左賢王歸
奏未央殿欲言塞下事天子不召見東出咸陽
門哀哀淚如霰

塞上

高適

東出盧龍塞浩然客思孤亭堠列萬里漢兵猶
備胡邊塵滿北溟虜騎正南驅轉鬪豈長策和
親非遠圖惟昔李將軍按節臨此都總戎掃大
漠一戰擒單于常懷感激心願効縱橫謨倚劍
欲誰語關河空鬱紆

射雉賦

儲光羲

曝暄理新翳迎春射鳴雉原田遙一色臯陸曠
千里遙聞呶喔聲時見雙飛起羃歷疎蒿下
毳深麥裏顧敵乃忘生爭雄方決死仁心貴勇
義豈復能傷此超遙下故墟迢遞回高時大夫
昔何苦取笑歡妻子

采蓮詞

儲光羲

淺渚荇花繁深潭菱葉踈獨往方自得恥邀淇
上姝廣江無術計大澤絕方隅浪中海童語流

下鮫人居春荻時隱舟新萍復滿湖采采日
養不思賢與愚

漁父詞

儲光羲

澤魚好鳴水谿魚好上流魚梁不得意下渚潛
垂鈎亂荇時礙楫新蘆復隱舟靜言念終始安
坐看沈浮素髮隨風揚遠心與雲遊逆浪還極
浦信潮下滄洲非爲徇行役所樂在行休

牧童詞

儲光羲

不言牧田遠不道牧陂深所念牛馴擾不亂牧

童心圓笠覆我首長簑披我襟方將憂暑雨亦
以懼寒陰大牛隱層坂小牛穿近林同類相鼓
舞觸物成謳吟取樂須臾間寧問聲與音

樵父詞

儲光義

山北饒朽木山南多枯枝枯枝作采薪爨室私
自知詰朝礪斧尋視暮行歌歸先雪隱薜荔迎
暄卧茅茨清澗日濯足喬林時曝衣終年登險
阻不復憂安危蕩漾與神遊莫知是與非

潼關吏

杜甫

士卒何草草築城湮關道大城鐵不如小城萬
丈餘借問潼關吏修關還備胡要我下馬行爲
我指山隅連雲列戰格飛鳥不能踰胡來但自
守豈復憂西都丈人視要處窄狹容單車艱難
奮長戟千古用一夫哀哉桃林戰百萬化爲魚
請囑防關將慎勿學哥舒

石壕吏

杜甫

暮投石壕村有吏夜捉人老翁踰牆走老婦出
門看吏呼一何怒婦啼一何苦聽婦前致詞三

男鄴城戍一男附書至二男新戰歿存者且偷
生歿者長已矣室中更無人惟有乳下孫孫有
母未去出入無完裙老嫗力雖衰請從吏夜歸
急應河陽役猶得備晨炊夜久語聲絕如聞泣
幽咽天明登前途獨與老翁別

新安吏

杜甫

客行新安道喧呼聞點兵借問新安吏縣小更
無丁府帖昨夜下次選中男行中男絕短小何
流守王城肥男有母送瘦男獨伶俜白水暮東

以青山猶哭聲莫自使眼枯收汝淚縱橫眼枯
卽見骨天地終無情我軍收相州日夜望其平
豈意賊難料歸軍星散營就糧近故壘練卒依
舊京掘壕不到水牧馬役亦輕况乃王師順撫
養甚分明送行勿泣血僕射如父兄

塞廬子

杜甫

五城何迢迢迢迢隔河水邊兵盡東征城內空
荆杞思明割懷衛秀巖西未已回略大荒來嶠
函蓋虛爾延川秦北戶關防猶可倚焉得一萬

人疾驅寒蘆子岐有薛大夫旁制山賊起近聞
昆戎徒爲退三百里蘆關扼兩寇深意實在
此誰敢叫帝闡胡行速如鬼

留花門

杜甫

北門天驕子飽肉氣勇決高秋馬肥健挾矢射
漢月自古以爲患詩人厭薄伐修德使其來羈
縻固不絕胡爲傾國至出入暗金闕中原有驅
除隱忍用此物公主歌黃鵠君王指白日連雲
屯左輔百里見積雪長戟鳥休飛哀笳曉幽咽

田家最恐懼麥倒桑枝折沙苑臨清渭泉香草
豐潔渡河不用船千騎常撒烈胡塵踰太行雜
種抵京室花門旣須留原野轉蕭瑟

新婚別

杜甫

兔絲附蓬麻引蔓故不長嫁女與征夫不如棄
路傍結髮爲君妻席不煖君牀暮婚晨告別無
乃太匆忙君行雖不遠守邊赴河陽妾身未分
明何以拜姑嫜父母養我時日夜令我藏生女
有所歸雞犬亦得將君今往死地沈痛迫中腸

誓欲隨君去形勢反蒼黃勿爲新婚念努力事
戎行婦人在軍中兵氣恐不揚自嗟貧家女
致羅縠裳羅縠不復施對君洗紅妝仰視百鳥
飛大小必雙翔人事多錯迂與君永相望

垂老別

杜甫

四郊未寧靜垂老不得安子孫陣亡盡焉用身
獨完投杖出門去同行爲辛酸幸有牙齒存所
悲骨髓乾男兒旣介冑長揖別上官老妻卧路
啼歲暮衣裳單孰知是死別且復傷其寒此去

必不歸還聞勸加餐土門壁甚堅杏園度亦難
勢異鄴城下縱死時猶寬人生有離合豈擇盛
衰端憶昔少壯日遲迴竟長歎萬國盡征戍烽
火被岡巒積屍草木腥流血川原丹何鄉爲樂
土安敢尚盤桓棄絕蓬室居塌然摧肺肝

無家別

杜甫

寂寞天寶後園廬但蒿藜我里百餘家世亂各
東西存者無消息死者爲塵泥賤子因陣敗歸
來尋舊蹊久行見空巷日瘦氣慘悽但對狐與

狸豎毛怒我啼四鄰何所有一二老寡妻宿鳥
戀本枝安辭且窮棲方春獨荷鋤日暮還灌畦
縣吏知我至召令習鼓鞞雖從本州役內顧無
所攜近行止一身遠去終轉迷家鄉旣盪盪遠
近理亦齊永痛長病母五年委溝谿生我不得
力終身兩酸嘶人生無家別何以爲丞黎

夏日歎

杜甫

夏日出東北陵天經中街朱光徹厚地鬱烝何
由開上蒼久無雷無乃號令乖雨降不濡物良

田起黃埃飛鳥苦熱歿池魚涸其涯萬人尚流
冗舉目惟蒿萊至今大河北盡作虎與豺浩蕩
想幽薊王師安在哉對食不能餐我心殊未諧
眇然貞觀初難與數子偕

夏夜歎

杜甫

永日不可暮炎蒸毒我腸安得萬里風飄颻吹
我裳昊天出華月茂林延疎光仲夏苦夜短開
軒納微涼虛明見纖毫羽蟲亦飛揚物情無巨
細自適固其常念彼荷戈士窮年守邊疆何由

綠筍總成竹紅花亦成子能當此時好獨自幽
閨裏夜夜苦更長愁來不如死

又

李白

君爲女蘿草妾作兔絲花輕條不自引爲逐春
風斜百丈託遠松纏縣成一家誰言會面易各
在青山崖女蘿發馨香兔絲斷人腸枝枝相糾
結葉葉競飄揚生子不知根因誰共芬芳中巢
雙翡翠上宿紫鴛鴦若識二草心海潮亦可量

又

蔣冽

冉冉紅羅帳開君玉樓上畫作同心鳥銜花兩
相向春風正可憐吹映綠窓前妾意空相感君
心何處邊

又

戴休珽

窮秋朔風起滄海愁陰漲虜騎掠河南漢兵屯
灞上羽書驚沙漠刁斗喧亭障關塞何蒼茫遙
烽遞相望弱齡負奇節俠客多招訪投筆棄繻
生提戈逐飛將

江風行

張潮

壻貧如珠玉壻富如埃塵貧時不忘舊富日多
寵新妾本富家女與君爲偶匹惠好一何深中
門不曾出妾有繡衣裳歲蕤金縷光念君貧且
賤易此從遠方遠方三千里思君心未已日暮
情更來空望去時水孟夏麥始秀江上多南風
商賈歸欲盡君今尚巴東巴東有巫山窈窕神
女顏常恐遊此方果然不知還

早春行

王維

紫梅發初遍黃鳥歌猶澁誰家折楊女弄春如

不及愛水看妝坐羞人映花立香畏風吹散衣
愁露霑濕玉閨青門裏日落香車入游衍益相
思含啼向綵帷憶君長入夢歸晚更生疑不及
紅簷燕雙栖綠草時

南州行

余延壽

搖艇至南國國門連大江中洲西邊岼數步一
垂楊金釧越谿女羅衣胡粉香織縑春卷幔采
蕨暝提筐弄瑟嬌垂幌迎人笑下堂河頭浣衣
處無數紫鴛鴦

鴻門行

袁瓊

少年買意氣百金不辭費學劍西入秦結交北
遊魏秦魏多報人與代亦殊倫由來不相識皆
是暗相親寶馬青絲轡狐裘貂鼠服晨過劇孟
遊暮投咸陽宿然諾本云云諸侯莫不聞猶思
百戰術更逐李將軍始從灞陵下遙遙度朔野
北風聞楚歌南庭見胡馬胡馬秋正肥相邀夜
合圍戰酣烽火滅路斷救兵稀白刃縱橫逼黃
塵飛不息虜騎血灑衣單于淚沾臆獻凱雲臺

中自言塞上雄將軍行失勢部曲遂無功新人
不如舊舊人不相救萬里長飄颻十年計不就
棄置難重倫驅馬度鴻門行看楚漢事不覺風
塵昏寶劍中夜撫悲歌聊自舞此曲不可終曲
終淚如雨

南都行

李白

南都信佳麗武關橫西關白水真人居萬商羅
鄠闔高樓對紫陌甲第連青山此地多英豪邈
然不可攀陶朱與五穀名播天壤間麗華秀玉

色漢女嬌朱顏清歌遏流雲豔舞有餘閑遨遊
盛苑洛冠蓋隨風還走馬紅陽城呼鷹白河灣
誰識臥龍客長吟愁鬢斑

漁父歌

李頎

白首何老人簑笠蔽其身避世長不仕釣魚清
江濱浦沙明濯足山月靜垂綸寓宿湍與瀨行
歌秋復春持竿湘岼竹爨火蘆洲薪綠水飯香
稻青荷包紫鱗於中還自樂所欲全吾真而笑
獨省者臨流多苦辛

春詞三首

常建

苑苑黃柳絲濛濛雜花垂日高紅妝臥倚對春
光遲寧知傍淇水驥裏黃金羈

又

翳翳陌上桑南枝交北堂美人金梯出素手自
提筐非但爲蠶饑盈盈嬌路傍

又

階下草猶短牆頭梨花白織女高樓上停梭顧
行客問君在何所青鳥舒錦翮

系樂府十二首

并序

元結

天寶辛未中元子將前世嘗可稱歎者爲詩
十二篇爲引其義以名之總命曰系樂府古
人詠歌不盡其情聲者化金石以盡之其歡
怨甚邪戲盡歡怨之聲者可以上感於上下
化於下故元子系之

思太古

東南三千里沅湘爲太湖湖上山谷深有人多
似愚嬰孩寄樹顛就水捕鷓鱸所歡同鳥獸身

意復何拘吾行遍九州此風皆已無吁嗟聖賢
教不覺久踟躕

隴上歎

援車登隴坂窮高遂停駕延望戎狄鄉巡迴復
悲咤滋移有情教草木猶可化聖賢禮讓風何
不遍西夏父子忍猜害君臣敢欺詐所適今若
斯悠悠欲安舍

頌東夷

嘗聞古天子朝會張新樂金石無全聲官商亂

清濁東驚且悲歎節變何煩數始知中國人耽
此亾純朴爾爲外方客何爲獨能覺其音若或
在蹈海吾將學

賤士吟

南風發天和和氣天下流能使萬物榮不能變
羈愁爲愁亦何爾自請說此由諂競實多路苟
邪皆共求嘗聞古君子指以爲深羞正方終莫
可江海有滄洲

欸乃曲

誰能聽欸乃欸乃感人情不恨湘波深不怨湘
水清所嗟豈敢道空羨江月明昔聞扣斷舟引
釣歌此聲始歌悲風起歌竟愁雲生遺曲今何
在逸爲漁父行

貧婦詞

誰知苦貧夫家有愁怨妻請君聽其詞能不爲
酸悽所憐抱中兒不如山下麴空念庭前地化
爲人吏蹊出門望山澤回頭心復迷何時見府
主長跪向之啼

去鄉悲

踟躕古塞關悲歌爲誰長日行見孤老羸弱相
提將聞其呼怨聲聞聲問其方乃言無患苦豈
棄父母鄉非不見其心仁惠誠所望念之何可
說獨立爲悽傷

壽翁興

借問多壽翁何方自修育惟云順所然忘情學
草木始知世上術勞苦化金玉不見充所求空
聞肆耽欲清和存王母潛渡無亂黷誰正好長

生此言堪佩服

農臣怨

農臣何所怨乃欲干人主不識天地心徒然怨
風雨將論草木患欲說昆蟲苦巡迴宮闕傍其
意無由吐一朝哭都市淚盡歸田畝謠頌共采
之此言當可取

謝大龜

客來自江漢云得雙大龜且言龜甚靈問我君
何疑自昔保方正顧嘗無忘思順和固鄙分全

守真常規行之恐不及此外將何爲惠恩如可
謝占問敢終辭

古遺歎

古昔有遺歎所歎何所爲有國遺賢臣萬世爲
冤悲所遺非遺望所遺非可遺所遺非遺用所
遺在遺之嗟嗟山海客全獨竟何辭心非膏濡
類安得無不遺

下客謠

下客無黃金豈思主人憐客言勝黃金主人然

不然珠玉成彩翠綺羅如嬋娟終恐見斯好有
時去君前豈知保忠信長使令德全風聲與時
茂歌頌萬千年

朝會

早朝

王維

皎潔明星高蒼茫遠天曙槐霧暗不開城鴉鳴
稍去始聞高閣聲莫辨更衣處銀燭已成行金
門儼駟馭

盛唐彙詩卷第四

四唐彙詩卷四

盛唐彙詩卷第五

四唐彙詩卷五

新都

吳勉學 編輯

陸麀祥 校訂

五言古體

述感

自悼

薛令之

朝日上團團照見先生盤盤中何所有首蓓長
闌干飯澁匙難縮羹稀筋易寬只可謀朝夕何
由保歲寒

玄宗續句云啄木嘴距長鳳皇毛羽短苦嫌松桂寒任逐桑榆暖

冬夜書懷

王維

冬宵寒且永夜漏宮中
發草白靄繁霜木衰澄
清月麗服映頹頹朱燈
照華髮漢家方尚少顧
影慙朝謁

初去郡齋書懷

薛據

肅徒辭汝頽懷古獨悽然
尚想文王化猶思巢父
賢時移多讒巧大道竟
誰傳况是疾風起悠悠
旌旆懸征鳥無返翼歸
流不停川已經霜雪下
乃驗松栢堅回首望城
邑迢迢間雲煙志士

不傷物小人皆自妍感時
惟責已在道非怨天從此
適樂土東歸知幾年

臺中書懷

蔣冽

持憲當休明飾躬免顛沛
直繩備豪右正色清冠蓋
寄切才恨薄職雄班匪大
坐居三獨中立在百僚外
簡牘時休暇依然秋興多
披書唯骨鯁循跡少閑和
庭樹凌霜柏池傾萎露荷
歲寒應可見感此遂成歌

南奔書懷

一作自丹陽南奔道中作

李白

遙夜何漫漫空歌白石爛
寧戚未匡齊陳平終
佐漢攬槍掃河洛直割鴻溝半
歷數方未遷雲
雷屢多難天人秉旄鉞
虎竹光籓翰侍筆黃金
臺傳觴青玉案不因秋風起
自有思歸歎主將
動讒疑王師忽離叛
自來白沙上鼓譟丹陽岸
賓御如浮雲從風各消散
舟中指可掬城上骸
爭鬩草草出近關行行昧
前筭南奔劇星火北
寇無涯畔顧乏七寶鞭
留連道傍翫太白夜食
昂長虹日中貫秦趙興天兵
茫茫九州亂感遇

明主恩頗高祖逃言過江
誓流水志在清中原
拔劍擊前柱悲歌難重論

江南春懷

李白

青春幾何時黃鳥鳴不歇
天涯失鄉路江外老
華髮心飛秦塞雲影滯楚關
月身世殊爛熳田
園久蕪沒歲晏何所從
長歌謝金闕

避地司空原言懷

李白

南風昔不競豪聖思經綸
劉琨與祖逖起舞鷄
鳴晨雖有匡濟心終爲樂
禍人我則異於是潛

光皖水濱上築司空原北將天柱鄰雪霽萬里
月雲開九江春俟乎泰階平然後託微身傾家
事金鼎年貌可長新所願得此道終然保清真
弄影奔日馭攀星戲河津一隨王喬去長年玉
天賓

秋夕書懷

一作秋日
南遊書懷

李白

北風吹海鴈南渡落寒聲感此瀟湘客淒其流
浪情海懷結滄洲霞想遊赤城始探蓬壺事旋
覺天地輕澹然吟高秋閑卧瞻太清蘿月隱空

幕松霜皓前楹滅見息羣動獵微窮至精桃花
有源水可以保吾生

江上秋懷

李白

餐霞卧舊壑散髮謝遠遊山蟬號枯桑始復知
天秋朔鴈別海裔越燕辭江樓颯颯風卷沙茫
茫霧縈洲黃雲結暮色白水揚寒流惻愴心自
悲潺湲淚難收蘅蘭方蕭瑟長歎令人愁

郢門秋懷

李白

郢門一爲客巴月三成弦朔風正搖落行子愁

歸旋杳杳山外日茫茫江上天人迷洞庭水鴈
度瀟湘煙清曠諸宿好緇磷及此年百齡何蕩
漾萬化相推遷空謁蒼梧帝徒尋溟海仙已聞
蓬海淺豈見三桃園倚劔增浩歎捫襟還自憐
終當遊五湖濯足滄浪泉

越中秋懷

李白

越水繞碧山周廻數千里乃是天鏡中分明盡
相似愛此從冥搜永懷林湍幽一爲滄波客十
見紅蕖秋觀濤壯天險望海令人愁路遐迫西
照歲晚悲東流何必探禹穴逝將歸蓬丘不然
五湖上亦可乘扁舟

廬山東林寺夜懷

李白

我尋青蓮宇獨往謝城闕霜清東林鐘水白虎
谿月天香生虛空天樂鳴不歇宴坐寂不動大
千入毫髮湛然冥真心曠劫斷出沒

春日醉起言志

李白

處世若大夢胡爲勞其生所以終日醉頽然卧
前楹覺來眄庭前一鳥花間鳴借問此何時春

風語流鶯感之欲歎息對酒還自傾浩歌待明月曲盡已忘情

冬夜醉宿龍門覺起言志 李白

醉來脫寶劍旅憇高堂眠中夜忽驚覺起立明
燈前開軒聊直望曉雪河水壯哀哀歌苦寒鬱
鬱獨惆悵傳說版築臣李斯鷹犬人歛起匡社
稷寧復長艱辛而我胡爲者歎息龍門下富貴
未可期殷憂向誰寫去去淚滿襟舉聲梁甫吟
青雲當自致何必求知音

宣城長史弟昭贈余琴谿中雙舞鶴詩

以見志

李白

令弟佐宣城贈余琴谿鶴謂言天涯雪忽向牕
前落白玉爲毛衣黃金不肯博背風振六翮對
舞臨山閣顧我如有情長鳴似相託何當駕此
物與爾騰廖廓

秋夕旅懷

李白

涼風度秋海吹我鄉思飛連山去無際流水何
時歸目極浮雲色心斷明月輝芳草歇柔豔白

露催寒衣夢長銀漢落覺罷天星稀含歎想舊國泣下誰能揮

荊州賊平臨洞庭言懷作 李白

脩虬橫洞庭吞象臨江島積骨成巴陵遺言聞楚老水窮三苗國地窄三湘道歲晏天崢嶸時危人枯槁思歸阻喪亂去國傷懷抱郢路方丘墟章華亦傾倒風悲猿嘯苦木落鴻飛早日隱西赤沙月明東城卓關河望已絕氛霧行當掃長叫天可聞吾將問蒼昊

覽鏡書懷

李白

得道無古今失道還衰老自笑鏡中人白髮如霜草捫心空歎息問影何枯槁桃李竟何言終成南山皓

自京赴奉先縣詠懷五百字 杜甫

杜陵有布衣老大意轉拙許身一何愚竊比稷與契居然成濩落白首甘契濶蓋棺事則已此志常艷豁窮年憂黎元歎息傷內熱取笑同學翁浩歌彌激烈非無江海志瀟灑送日月生逢

堯舜君不忍便永訣當今廊廟具構厦豈云缺
葵藿傾太陽物性固莫奪顧惟螻蟻輩但自求
其穴胡爲慕大鯨輒擬偃溟渤以茲悟生理獨
耻事干謁兀兀遂至今忍爲塵埃沒終愧巢與
由未能易其節沈飲聊自遣放歌頗愁絕歲暮
百草零疾風高岡裂天衢陰崢嶸客子中夜歎
霜嚴衣帶斷指直不得結凌晨過驪山御榻在
蟠嶼蚩尤塞寒空蹴踏崖谷滑瑤池氣鬱律羽
林相摩戛君臣留歡娛樂動股膠葛賜浴皆長

纓與宴非短褐彤庭所分帛本自寒女出鞭撻
其夫家聚斂貢城闕聖人筐篚恩實欲邦國活
臣如忽至理君豈棄此物多士盈朝廷仁者宜
戰慄况聞內金盤盡在衛霍室中堂有神仙煙
霧蒙玉質煖客貂鼠裘悲管逐清瑟勸客馳啼
羹霜橙壓香橘朱門酒肉臭路有凍死骨榮枯
咫尺異惆悵難再述北轅就涇渭官渡又改轍
羣水從西下極目高崒兀疑是崆峒來恐觸天
柱折河梁幸未坼枝撐聲窸窣行旅相攀援川

廣不可越老妻旣異縣十口隔風雪誰能久不
顧庶往共饑渴入門聞號咷幼子饑已卒吾寧
捨一哀里巷亦嗚咽所媿無人父無食致夭折
豈知秋未登貧窶有倉卒生常免租稅名不隸
征伐撫迹猶酸辛平人固騷屑默思失業徒因
念遠戍卒憂端齊終南頽洞不可掇

詠懷二首

杜甫

人生貴是男丈夫重天機未達善一身得志行
所爲嗟余竟軼軻將老逢艱危胡雛逼神器逆

節同所爲河洛化爲血公卿草間啼西京復陷
沒翠蓋蒙塵飛萬姓悲赤子兩宮棄紫微倏忽
向一紀姦雄多是非本朝再樹立未及貞觀時
日給在軍儲上官督有司高賢迫形勢豈暇相
扶持疲蕭苟懷策棲屑無所施先王實罪已愁
痛正爲茲歲月不我與蹉跎病於斯夜看豐城
氣回首蛟龍池齒髮已自料意深陳苦辭

又

邦危壞法則聖遠益愁慕飄飄桂水遊悵望蒼

梧暮潛魚不御鈎走鹿無反顧皦皦幽曠心拳
拳異平素衣食相拘閔朋知限流寓風濤上春
沙十里浸江樹逆行少吉日時節空復度井竈
任塵埃舟航煩數具牽纏加老病瑣細隘俗務
萬古一死生胡爲足名數多憂汗桃源拙計泥
銅柱未辭炎瘴毒擺落跋涉懼虎狼窺中原焉
得所歷住葛洪及許靖避世常此路賢愚誠等
差自愛各馳驚羸瘠且如何魄奪鍼灸屢擁滯
僮僕慵稽留篙師怒終當掛帆席天意難告訴

南爲祝融客勉疆親杖屨結託老人星羅浮展
衰步

述懷

杜甫

去年潼關破妻子隔絕久今夏草木長脫身得
西走麻鞋見天子衣袖露兩肘朝廷慙生還親
故傷老醜涕淚受拾遺流離主恩厚柴門雖得
去未忍卽開口寄書問三川不知家在否此聞
同罹禍殺戮到雞狗山中漏茅屋誰復依戶牖
摧頽蒼梧根地冷骨未朽幾人全性命盡室豈

相偶欽峯猛虎場鬱結回我首自寄一封書今
已十月後反長消息來寸心亦何有漢運初中
興平生老耽酒沈思歡會處恐作窮獨叟

寫懷二首

杜甫

勞生共乾坤何處異風俗冉冉自趨競行行見
羈束無貴賤不悲無富貧亦足萬古一骸骨鄰
家逝歌哭鄙夫到巫峽三歲如轉燭全命甘留
滯忘情任榮辱朝班及暮齒日給還脫粟編蓬
石城東採藥山北谷用心霜雪間不必條蔓綠

非關故安排曾是順幽獨達士如弦直小人似
鈎曲曲直吾不知負暄候樵牧

又

夜深坐南軒明月照我膝驚風翻河漢梁棟已
出日羣生各一宿飛動自儔匹吾亦驅其兒營
營爲私實天寒行旅稀歲暮日月疾榮名忽中
人世亂如蟣虱古者三皇前滿腹志願畢胡爲
有結繩陷此膠與漆禍首燧人氏厲階董狐筆
君看燈燭張轉使飛蛾密放神八極外俛仰俱

蕭瑟終契如往還得匪合仙術

遣懷

杜甫

昔我遊宋中惟梁孝王都名今陳留亞劇則具
魏俱邑中九萬家高棟照通衢舟車半天下主
客多歡娛白刃讐不義黃金傾有無殺人紅塵
裏報荅在斯須憶與高李輩論交入酒壚兩公
壯藻思得我色敷腴氣酣登吹臺懷古視平蕪
芒碭雲一去鴈鶩空相呼先帝正好武寰海未
凋枯猛將收西域長戟破林胡百萬攻一城獻

捷不云輸組練棄如泥尺土負百天拓境功未
已元和辭大鑪亂雜朋友盡合脊歲月徂吾衰
將焉託存歿再嗚呼蕭條益堪媿獨在天一隅
乘黃已去矣凡馬徒區區不復有顏鮑繫舟卧
荆巫臨餐吐更食常恐違撫孤

上水遣懷

杜甫

我衰太平時身病戎馬後蹭蹬多拙爲安得不
皓首驅馳四海內童穉日餬口但遇新少年少
逢舊親友低顏下色地故人知善誘後生血氣

豪舉動見老醜窮迫挫曩懷常如中風走一紀
出西蜀于今向南斗孤舟亂春華暮齒依蒲柳
冥冥九疑葬聖者骨已朽蹉跎陶唐人鞭撻日
月久中間屈賈輩讒毀竟自取鬱沒二悲魂蕭
條猶在否齒岸清湘石逆行雜林藪篙工密逞
巧氣若酣杯酒訶謳互激遠回幹明受授善知
應觸類各藉脫穎手古來經濟才何事罕獨有
蒼蒼衆色晚熊挂玄蛇吼黃黑在樹顛正爲群
虎守羸骸將何適履險顏益厚庶與達者論吞

聲混瑕垢

解憂

杜甫

減米散同舟路難思共濟向來雲濤盤衆力亦
不細呀吭瞥眼過飛櫓本無蒂得失瞬息間致
遠猶恐泥百慮視安危分明曩賢計茲理庶可
廣拳拳期勿替

遣遇

杜甫

磬折辭主人開帆駕洪濤春水滿南國朱崖雲
日高舟子廢寢食飄風爭所操我行匪利涉謝

爾從者勞石間采蕨女鬻菜輸官曹丈夫死百
役暮返空村號聞見事略同刻剝及錐刀貴人
豈不仁視汝若莠蒿索錢多門戶喪亂分嗷嗷
柰何黠吏徒漁奪成逋逃自喜遂生理花時貰
緼袍

昔遊

杜甫

昔與高李輩晚登單父臺寒蕪際碣石萬里風
雲來桑柘葉如雨飛藿共徘徊清霜大澤凍禽
獸有餘哀是時倉廩實洞達寰區開猛士思滅

胡將帥望三台君王無所惜駕馭英雄材幽燕
盛用武供結亦勞哉吳門轉粟帛泛海陵蓬萊
肉食三十萬獵射起塵埃隔河憶長眺青歲已
摧頽不及少年日無復故人杯賦詩獨流涕亂
世想賢才有能市駿骨莫恨少龍媒商山議得
失蜀主脫嫌疑呂尚封國邑傳說已鹽梅景晏
楚山深水鶴去低徊龐公任本性攜手臥蒼苔

遣興五首

杜甫

朔風飄胡鴈慘澹帶砂礫長林何蕭蕭秋草萋

更碧北里富薰天高樓夜吹笛焉知南鄰客九月猶絺綌

長陵銳頭兒出獵待明發驛弓金瓜鎬白馬跡微雪未知所馳逐但見暮光滅歸來懸兩狼門戶有旌節

漆有用而割膏以明自煎蘭摧白露下桂折秋風前府中羅舊尹沙道尚依然赫赫蕭京兆今

爲時所憐

猛虎馮其威往往遭急縛雷吼徒咆哮枝撐已在脚忽看皮寢處無復睛閃鑠人有甚於斯足以勸元惡

又

朝逢富家葬前後皆輝光共指親戚大總麻百夫行送者各有死不須羨其強君看束縛去亦得歸山岡

又三首

杜甫

下馬古戰場四顧但茫然
風悲浮雲去黃葉墜
我前朽骨穴螻蟻又爲蔓草纏
故老行歎息今人尚開邊
漢虜互勝負封疆不常全
安得廉頗將三軍同晏眠

又

高秋登塞山南望馬邑州
降虜東擊胡壯健盡不畱
穹廬莽牢落上有行雲愁
老弱哭道路願聞甲兵休
鄴中事反覆死人積如丘
諸將已茅

土載驅誰與謀

又

豐年孰云遲甘澤不在早
耕田秋雨足禾黍已映道
春苗九月交顏色同日老
勸汝衡門士勿悲尚枯槁
時來展才力先後無醜好
但訝鹿皮翁忘機對芳草

又二首

杜甫

天用莫如龍有時繁扶桑
頓轡海徒涌神人身更長
性命苟不存英雄徒自強
吞聲勿復道真

宰意茫茫

又

地用莫如馬無良復誰記此日千里鳴追風可
君意君看渥洼種態與駑駘異不雜蹄齧間道
遙有能事

又三首

杜甫

蓬生非無根漂蕩隨高風天寒落萬里不復歸
本藜客子念故宅三年門巷空悵望但烽火戎
車滿關東生涯能幾何常在羈旅中

又

我今日夜憂諸弟各異方不知死與生何況道
路長避寇一分散饑寒永相望豈無柴門歸欲
出畏虎狼遠看雲中鴈禽獸亦有行

又

昔在洛陽時親友相追攀送客東郊道遨遊宿
南山煙塵阻長河樹羽成臯間迴首載酒地豈
無一日還丈夫貴壯健慘戚非朱顏

又五首

杜甫

螿龍三冬卧老鶴萬里心昔時賢俊人未遇猶
視今嵇康不得死孔明有知音又如壠底松用
捨在所尋大哉霜雪幹歲久爲枯林

又

昔者龐德公未曾入州府襄陽者舊間處士節
獨苦豈無濟時策終竟畏羅罟林茂鳥有歸水
深魚知聚舉家隱鹿門劉表焉得取

又

陶潛避俗翁未必能達道觀其著詩集頗亦恨

枯槁達生豈是足默識蓋不早有子賢與愚何
其挂懷抱

又

賀公雅吳語在位常清狂上疏乞骸骨黃冠歸
故鄉爽氣不可致斯人今則亡山陰一茅宇江
海日清涼

又

吾憐孟浩然短褐卽長夜賦詩何必多徃徃凌
鮑謝清江空舊魚春雨餘甘蔗每望東南雲令

人幾悲吒

昔遊

杜甫

昔謁華蓋君綠袍
毘玉脚人棺已上天
白日亦寂寞暮升艮
岑頂巾几猶未却
弟子四五人入來
淚俱落余時遊名
山發軔在遠壑良
覲違夙願含淒向
寥廓林昏罷幽磬
竟夜伏石閣王喬
下天壇微月映皓
鶴晨谿嚮虛駛歸
徑行已昨豈辭青
鞋祇悵望金七藥
東蒙赴舊隱尚憶
同志樂伏事堯聖
先生於今獨蕭索
胡爲客關塞道

意久衰薄妻子亦何人
丹砂負前諾雖悲髮鬢
變未憂筋力弱杖藜望
清秋有興入廬霍

壯遊

杜甫

往者十四五出遊翰墨場
斯文崔魏徒以我似班
楊七齡思卽壯開口詠鳳
凰九齡書大字有作成一
囊性豪業嗜酒嫉惡懷剛
腸脫略小時輩結交皆老
蒼飲酣視八極俗物都茫
茫東下姑蘇臺已具浮海
航到今有遺恨不得窮扶
桑王謝風流遠闔廬丘墓
荒劔池石壁仄長洲芟

荷香嵯峨閶門北清廟映迴塘每趨吳泰伯撫
事淚浪浪枕戈憶勾踐渡浙想秦皇蒸魚聞七
首除道哂要章越女天下白鑑湖五月涼剡谿
蘊秀異欲罷不能忘歸帆拂天姥中歲貢舊鄉氣
廟屈賈壘日短曹劉墻忤下考功第獨辭京尹
堂放蕩齊趙間裘馬頗清狂春歌叢臺上冬獵
青丘旁呼鷹阜櫪林逐獸雲雪同射飛曾縱鞚
引臂落鴉鷁蘇侯據鞍喜忽如攜鳥疆快意八
九年西歸到咸陽許與必詞伯賞遊實賢王曳

裾置醴地奏賦入明光天子廢食召羣公會軒
裳脫身無所愛痛飲信行藏黑貂不免弊斑鬢
兀稱觴杜曲晚耆舊四郊多白楊坐深鄉黨敬
日覺死生忙朱門任傾奪赤族迭罹殃國馬竭
粟豆官雞輸稻梁舉隅見煩費引古惜興亡河
朔風塵起岷山行幸長兩官各警蹕萬里遙相
望崆峒殺氣黑少海旌旗黃禹功亦命子涿鹿
親戎行翠華擁吳嶽螭虎噉豺狼爪牙一不中
胡兵更陸梁大軍載草草凋瘵滿膏肓備員竊

補衮憂憤心飛揚上感九廟焚下憫萬民瘡斯
時伏青蒲廷諍守御牀君辱敢愛死赫怒幸無
傷聖哲體仁恕寓縣復小康哭廟灰燼中鼻酸
朝未央小臣議論絕老病客殊方鬱鬱苦不展
羽翮困抵昂秋風動哀壑碧蕙捐微芳之推避賞從
漁父濯滄浪榮華敵勲業歲暮有嚴霜吾觀鴟
夷子才力出尋常羣兇逆未定側佇英俊翔

忝官

天下昔無事僻居養愚鈍山野性所安熙然自

全順忽逢暴兵起閭巷見軍陣將家瀛海濱自
棄同芻糞往在乾元初聖人啓休運公車詣魏
闕天子垂清問敢誦王者箴亦獻當時論朝廷
愛方直明主嘉忠信屢授不次官曾與專征印
兵家未曾學榮利非所徇偶得兇醜降切勞愧
方寸爾來將四歲慙耻言可盡請取寃者辭爲
吾忝官引寃辭何者苦萬邑餘灰燼寃辭何者
悲生人盡鋒刃寃辭何者甚力役遇勞困寃辭
何者深孤弱亦哀恨無謀救寃者祿位安可近

而可愛軒裳其心又于進此言非所戒此言敢
貽訓實欲辭無能歸耕守吾分

秋懷

閻寬

下帷長日盡虛館早涼生芳草猶未薦如何晴
蜩鳴秋風已振衣客土何時歸爲問當途者寧
知心有違

濮中言懷

沈千運

聖朝優賢良草澤無遺匿人生各有命在余胡
不淑一生但區區五十無寸祿衰退當棄捐貧

賤招毀齟栖栖去人世屯躋日窮迫不如守田
園歲晏望豐熟壯年失宜盡老大無筋力始愴
前計非將貽後生福童兒新學稼少女未能織
顧此煩知已終日求衣食

傷情

孟雲卿

爲長心易憂早孤意常傷出門先躊躇入戶亦
彷徨此生一何苦前事安可忘兄弟先我沒孤
幼盈我傷舊居近東南河水新爲梁松栢今在
茲安忍思故鄉四時與日月萬物各有常秋風

已一起草木無不霜行行當自勉不忍再思量
丙戌歲正月出洛陽書懷 獨孤及

往歲衣褐見受服金馬門擬將忠與貞來酬主
人恩天地暫雷雨洪波生平原窮鱗遂蹭蹬夙
昔事罕存幸逢帝出震授越清東藩白日忽再
中萬方咸駿奔王風從西來春光滿乾坤蟄蟲
競飛動余亦辭籠樊遭遇思自強寵辱安足言
唯將四方志廻首謝故園

田園觀雨兼晴後作

孟雲卿

貧賤少情欲借荒種南陂我非老農圃安得良
土宜秋成不廉儉歲餘多餒饑顧視倉廩間有
糧不成炊晨登南園上暮歇清蟬悲早苗旣茂
茂晚田尚離離五行孰堪廢萬物當及時賢哉
數夫子開翅慎勿遲

秋浦歌二首

李白

秋浦長似秋蕭條使人愁客愁不可度行上東
大樓正西望長安下見江水流寄言向江水汝
意憶儂不遙傳一鞠淚爲我達揚州

又

千千石楠樹萬萬女貞林山山白鷺滿澗澗白
猿吟君莫向秋浦猿聲碎客心

古遠行

元季川

悠悠遠行者羈獨當時思道與日月長人無第
舍期出門萬里心誰不傷別離縱遠當白髮歲
月悲今時何況異形容安須與爾悲

盛唐彙詩卷第五

四唐彙詩七十五

盛唐彙詩卷第五

